

10 DEC 1999

Kabinet-Effendi

EFFENDI TERKEJUT DILANTIK MENTERI PERTANIAN

KUALA LUMPUR, Nov 10 (Bernama) -- Muka baru dalam senarai kabinet Datuk Seri Dr Mahathir Mohamad yang diumumkan hari ini, Datuk Effendi Norwawi, mengakui terkejut dengan pelantikan itu, sambil menyifatkannya sebagai sesuatu yang "tidak disangka-sangka."

Effendi, 51, yang baru saja dipilih sebagai Ahli Parlimen Kuala Rajang, di Sarawak, berkata pelantikannya sebagai Menteri Pertanian oleh Perdana Menteri merupakan satu amanah dan tanggungjawab besar dan berat, yang harus dipikul.

"Ia penuh dengan cabaran dan peluang untuk berbakti kepada rakyat Malaysia terutama dalam sektor pertanian," katanya kepada Bernama di kediamannya di Jalan Duta di sini.

Beliau berterima kasih kepada Perdana Menteri dan juga Ketua Menteri Sarawak Tan Sri Abdul Taib Mahmud di atas kepercayaan yang "amat tinggi" itu.

"Saya memang tidak sangka pelantikan ini, dan hanya tahu petang ini, selepas pengumuman Perdana Menteri di kaca televisyen," katanya yang menggantikan seorang lagi tokoh dari Sarawak, Datuk Amar Dr Sulaiman Daud.

Ditanya mengenai pembabitannya dalam bidang perniagaan, antaranya sebagai pemilik stesen televisyen NTV7, beliau berkata satu "penyesuaian" yang besar perlu dilakukan dalam masa yang singkat, supaya syarikatnya dijalankan oleh pihak lain.

"Ini bagi membolehkan saya menumpukan perhatian sepenuhnya kepada jawatan baru saya," tambahnya.

Beliau berkata masih ramai rakyat di luar bandar yang terlibat dalam sektor pertanian dan "saya akan usahakan program dan rancangan baru" yang boleh membawa teknologi baru pada sektor ini.

Ini termasuk menambahkan hasil pertanian, perikanan dan peladangan, justeru menambahkan pendapatan petani, nelayan dan pekebun.

Effendi berkata satu kajian menyeluruh akan dibuat supaya kekuatan dan kelemahan di kementerian yang bakal diterajunya itu dapat dilihat, sebelum dapat memberikan cadangan baru untuk mempertingkatkan lagi kemampuan kementerian dan agensi-agensinya di bawahnya.

Beliau juga berkata akan mempertingkatkan usaha bekas menteri pertanian dalam bidang bioteknologi.

Sementara itu, Datuk G. Palanivel, yang dilantik sebagai Timbalan Menteri Pembangunan Luar Bandar mengucapkan terima kasih kepada Perdana Menteri dan presiden MIC Datuk Seri S. Samy Vellu di atas pelantikan itu, satu kenaikan pangkat dari jawatannya sebelum ini sebagai setiausaha parlimen Kementerian Perpaduan Negara dan Pembangunan Masyarakat.

"Saya akan berusaha sedaya boleh dan bekerja keras melalui jawatan baru ini," kata beliau.

G Palanivel berkata seperti juga dengan kementeriannya sebelum ini, jawatan barunya itu akan memberikannya peluang untuk berkhidmat kepada rakyat.

-- BERNAMA

MEO zb